

Maandag 23 November

Skrifgedeelte: Psalm 23

Fokusgedeelte: Psalm 23:1

Die HERE is my herder; niks sal my ontbreek nie

*"Die HERE is my herder; niks sal my ontbreek nie."* Met hierdie bekende, troosryke woorde begin hierdie geliefde psalm. Geliefd omdat die HERE ons met hierdie psalm troos en bemoedig. Nie met niksseggende woorde of leë beloftes nie, maar met Wie Hy is en wat Hy doen. Hy is ons Goeie Herder. Hy lei ons en gee vir ons alles wat ons nodig het. Selfs in doodsgevaar beskerm en vertroos Hy ons.

Hierdie Psalm sing van ons Here Jesus Christus. Hy sê Self in Johannes 10 dat Hy die Goeie Herder is wat sy lewe af lê vir sy skape (ons) en dit weer opneem. Deur sy dood en opstanding het Hy die dood oorwin en Hy laat ons in daardie oorwinning deel. Hy ken ons.

Daarom het ons troos! Nie net in hierdie lewe nie, maar vir die dood ook. Ons Goeie Herder het die dood oorwin. Hy lei ons deur sy Gees tot in ewigheid. *"Die HERE is my herder; niks sal my ontbreek nie."* Niks sal my ontbreek nie. Nie nou nie. Nie wanneer die dood naby is nie. Nooit nie.

Mag ons elkeen ons Goeie Herder volg, na sy stem luister, deur Hom verkwik word en deur Hom getroos word.

*Sing: Psalm 23-1:1 ,2, 3*

*Ds. GP (Gerrie) van Rhyn (Komatipoort)*